



20. august 2021

UKA 2021/146

Inatsisartut ingerlatsinermut maleruagassaasa § 33 tunngavigalugu Inatsisartunut ukuninga aaliangiiffigisassatut siunnersuuteqarpunga:

**Inatsisartut aaliangiiffigisassaattut siunnersuut Naalakkersuisut peqquneqassasut Naalagaaffimmi oqartussaasunut saaffigineqqullugit qulakkeerniarlugu, Kalaallit Nunaata killilersorneqanngitsumik Istanbulimi isumaqatigiissummut ilanngunnissaa. Tamanna pissaaq UPA2022 pisinnagu.**

(Inatsisartunut ilaasorta Anna Wangenheim, Demokraatit)

### **Tunngavilersuut**

Inuit tamarmik pisinnaatitaaffigaat angerlarsimaffimminni toqqissisimaffeqarnissaaq. Ullumikkulli ajorluartumik taamaangilaq, sulii imaamat, amerlavallaat – pingaartumik arnat – angerlarsimaffimmi persuttartittarmata. Persuttaaneq akuerineqarsinnaangilaq, pingaartuuvorlu, uagut aaliangiisartutut persuttaanerup akiorniarnernik ukkatarinnittuarnissarput.

Europarådip isumaqatigiisutaa arnat persuttarneqartarnerisa angerlarsimaffimmilu persuttaasarnerup pinaveersaartinnissaanik, Istanbulimi isumaqatigiisutitut ilisimaneqarnerusoq, 2011-mi atuutilersinneqarpoq. Isumaqatigiisutit arnat persuttaanerumut ullut tamaasa illersorpai sivikitsuinnarmillu atuunnermini nunani arlaqartuni annertuumik allannguisimalluni. Danmarkimi soorlu assersuutigalugu tarnikkut persuttaanerup inatsisunik unioqqutitsinermik kinguneqarnera aammalu nutaamik pinngitsaaliilluni atoqateqarnerumut aaliangersakkamik nutaamik pilersitsinermut – akuersinermik inatsimmik taaneqartoq.

Demokraatit isumaqarput Kalaallit Nunaata nunat akimorlugit Istanbulimi isumaqatigiisummut ilanngunneratigut takutitseqataasinnaasugut, persuttaanerumut pinaveersaartitsineq aammalu arnat meeqqallu persuttarneqarsinnaanerannut illersuinerput, pimoorukkipput. Inuiaqatigiinnut maligassiulluta meeqqatta pisinnaatitaaffiinut atatillugu iliuusissatut pilersarusiorsimalluta inissisimalernikuuvugut. Ilaqutariinnut tamakkiisumik ukkatarinnittariaqarpuguttaaq, tassanilu arnat illersorneqarnissaminnik pisinnaatitaaffeqarnerat ilanngullugu. Taamaaliornerup periarfississavaa meerarisat persuttaanerumut illersorneqarnissaat.

Demokraatit isumaqarputtaaq, nunami tamarmi qimarnuiffinnik pilersitsinerup unamminartoq tamakkiisumik aqqinnaviangikkaa. Ersarissumik ukiorpassuit ingerlanerini politikikkut pingaartinneqartarsimavoq, maannakkorpiaq aqqiisarluni, pinaveersaartitsinermik sivisuumillu atuuttussanik pinnani. Arnaq meeraalu angerlarsimaffimmik qimagutsikkaanni, persuttaaffiusumit, persuttaanerumut ajornartorsiut aqqinneqarsinnaangilaq. Iluaqutaangilaq, arnaq meerarlu/meeqqallu piffissami sivikitsumi angerlarsimaffimmit qimagutsinneqarpat utertillugillu, angerlarsimaffimmi pinaveersaartitsinermik suliniutinik aallartitsisimangikkaanni. Taamaattumik isumaqatigiisummut ilaalernerup ukkatarinninnerulernermik kinguneqassaaq, aammalu qanoq iliorluta angerlarsimaffimmik toqqissisimanartumik pilersitsisinnaanersugut, meeqqat iluarisimaarfigisinnaasaannik.



Ajoraluartumik nunaqarpugut, angerlarsimaffimmi persuttaanermik annertoorujussuarmik unamminartitsisumi, suliniutillu tamarmik, angerlarsimaffimmi persuttaanermik pinaveersaartitsisinnaasut tamaasa qujarunneqartariaqarput.

Taamatut oqaaseqarlunga Naalackersuisut akissutissaat partiillu allat oqaaseqaatissaat qilanaarlunga utaqqissavakka.

**Pisortanut aningaasatigut allaffissornikkullu kingunissai**

Naalackersuisut § 37 apeqqummut normu 054-2021 akissummini nalunaarput, aningaasatigut allaffissornikkullu Istanbulimi isumaqatigiisummut ilanngunneq kinguneqassanngitsoq<sup>1</sup>.

**Namminersorlutik inuussutissarsiteqartunut aningaasatigut allaffissornikkullu kingunissai**

Soqanngilaq

**Innuttaasunut aningaasatigut allaffissornikkullu kingunissai**

Soqanngilaq. Kisiannili innuttaasut – pingaartumik arnat – angerlarsimaffimmi persuttarneqartartut persuttarneqarsimasulluunniit, tarnimikkut persuttarneqartut, pinngitsaalineqarlutillu atoqatigineqarsimasut assigisaallu misigissavaat, politikikkut annertunerusumik pinaveersaartitsisoqarlunilu sorsuutiginnittoqartoq.

---

<sup>1</sup> [https://ina.gl/documents/para3637/2021/svar/054\\_2021\\_Grooming\\_Alliaq\\_ANWA\\_rett\\_svar.pdf](https://ina.gl/documents/para3637/2021/svar/054_2021_Grooming_Alliaq_ANWA_rett_svar.pdf)